

gen clarissimi Muratorii per Socios Palatinos Mediolanenses locupletiore redditam, auctioremque, Florentiae ex typographia Petri Caietani Viviani in vulgus prodivit. Et certe, ut verum candide fatear, penes laudatum typographum facultas amplius non erat, Opus praeclare, incoeptum feliciterque ad umbilicum perducere; tot tantisque difficultatibus obsitum implexumque iis, qui illud edendi provinciam susceperant, quotidie magis comparebat. Namque ad exhibendos optimos illos conatus multarum, quibus opus erat, laborabatur rerum penuria, quas non inconsulte silentio duximus praeterire. Nobis autem, super haec omnia, tot nova, ac nondum in lucem prodita Scriptorum molimina ad manum sunt, tot integrae tractationes ad rem pertinentes non iniucundae in nostris hospitantur hibernis, ut satis superque sint ad hanc Editionem etiam ampliorem efficiendam.

Quod superest, optime Lector, docebit Te rerum Index, his ipsis, quae iam praefatur, subiunctus, Nos in auctorum numerum eos non solum cooptasse Scriptores, qui temporum historias concinnarunt, & quos chronographos nuncupant, sed etiam, qui locorum descriptiones litteris tradidere, quos topographos distitarunt, cuius maxime generis est BERNARDUS ORICELLARIUS, qui Librum de Urbe Roma, seu doctissimum Commentarium in Publium Victorem, ac Sextum Rufum de Regionibus Urbis posteritati reliquit. Neque id temere; nam, quum de ferendo iudicio super hac re mature, opportuneque ageretur, & nostrates non pauci magni nominis, atque auctoritatis fama celeberrimi viri digladiaturi in arenam descenderent, & quid singuli sentirent, edicerent, praenuntiarentque; Nobis tandem visum est ceteris omnibus praeferendum sapientissimi Ioannis Lamii consilium, qui bene, ac laudabiliter topographos etiam Scriptores, & potissimum Oricellarium in hac Editione recenseri posse comprobavit. Verum, ne cancellos, quos ipse mihi circumdedi, egredi videar, longioribus verbis rem non protraho. Interea, optime Lector, hisce ferculis Tibi libenter adpositis, tuoque palato, ut Nobis sperare fas est, adprime adcommodatis, ex voto nostro utere, quibus vel leviter degustatis cupidissime adpetes ea omnia, quae ex aequo Tibi sumus daturi, Nosque in tuum unice intentos commodum indefinenter ama.